



Հարգելի՛ ընթերցող.

ԵՊՀ հայագիտական հետազոտությունների ինստիտուտը, չհետապնդելով որևէ եկամուտ, իր կայքերում ներկայացնելով հայագիտական հրատարակություններ, նպատակ ունի հանրությանն ավելի հասանելի դարձնել այդ ուսումնասիրությունները:

Մենք շնորհակալություն ենք հայտնում հայագիտական աշխատասիրությունների հեղինակներին, հրատարակիչներին:

Մեր կոնտակտները՝

Պաշտոնական կայք՝ <http://www.armin.am>

Էլ. փոստ՝ info@armin.am

Ի ՀԱՅՐԱՊԵՏՈՒԹԵԱՆ
Տ. Տ. ԳԱՐԵԳՆԻ Ա
ՍՐԲԱԶՆԱԳՈՅՆ ԿԱԹՈՂԻԿՈՍԻ
ԱՄԵՆԱՅՆ ՀԱՅՈՑ

ՀՐԱՄԱՆԱԻ
Տ. ՊԱՐԳԵԻԻ
ՍՐԲԱԶԱՆ ԵՊԻՍԿՈՊՈՍԻ
ԱՌԱԶՆՈՐԴԻՆ ԱՐՅԱԽԱՅ

ՔԱՐՈՋ ԵՐԿՆՔԻ ԱՐՔԱՅՈՒԹԻԻՆԸ ՓՆՏՐԵԼՈՒ ՄԱՍԻՆ*

«Նախ փնտրեցէ՛ք Աստուծոյ
արքայութիւնն ու Նրա արդա-
րութիւնը, եւ այդ ամէնը աւել-
լիով կտրուի ձեզ»¹:

Սուրբ Հոգու օգնականութեամբ եւ ձեր
աղօթքների օժանդակութեամբ կամենում եմ
մեկնաբանել այս խօսքը՝ քարոզելով նախ՝
փնտրողների, երկրորդ՝ արքայութեան, եր-
րորդ՝ խնդրածքների մասին:

Ա

Փնտրողների մասին

Պէտք է գիտենալ, որ ոմանք չեն փրկու-
րում Աստուծոյ արքայութիւնը, այլ փախչում
են նրանից. ոմանք փնտրում են, բայց չեն
գտնում. ոմանք փնտրում եւ գտնում են, սա-
կայն չեն պահում. իսկ ոմանք էլ փնտրում,
գտնում եւ պահում են: Այսպէս մարդիկ բա-
ժանում են չորս դասի:

Ովքեր չեն փնտրում Աստուծոյ արքա-
յութիւնը, այլ փախչում են նրանից, իրենց
կեանքի բոլոր օրերում չեն դադարում չարիք

* Տե՛ս Ս. Գրիգոր Տաթևացի, Զարոզ յերկրորդ կիրա-
կէն վասն խնդրելոյ, «Գիրք քարոզութեան, որ կոչի Ձմեռան
հատոր», Կ. Պոլիս, 1740, գլ. ԼԳ, էջ 333:

1 Տե՛ս Մատթ. Զ 33:

Մեկենասութեամբ Արման Ուզունեանի՝
ի յիշատակ իր ծնողների՝
Նազար եւ Երջանիկ Ուզունեանների

Ouvrage publié avec le concours de
Mr. Armand Ouzounian
à la mémoire de ses parents
Nazar et Yértchanik Ouzounian



ԳԱՆՉԱՍԱՐ
ԱՍԽՈՒՄԱՐԱՆԱԿԱՆ ԿՆՏՐՈՒ

Երեւան 1995

գործելուց: Սրանց մասին է ասում ս. Յովհաննէս Ոսկեբերանը, թէ չար մարդիկ կամենում են յաիտեան ապրել, որպէսզի հանապազ չարը գործեն. եւ միշտ ցանկանում են կենդանի լինել, որպէսզի չդադարեն մեղանչելուց: Ուստի նրանք, ովքեր այս աշխարհում երբէք չեն դադարում մեղք գործելուց, մատնում են Աստուծոյ արդար Դատաստանին ու երբէք չեն գերծանում տանջանքներից: «Չենք կամենում ճանաչել Քո ճանապարհները. ո՞վ է Ամենակալը, որ ծառայենք Նրան»², - այսպիսի դառն ու դժնդակ պատասխան են տալիս նրանք, երբ որեւէ մէկը խրատում է իրենց:

Եւ այս ոչ միայն անհաւատներն ու չարագործներն են, այլեւ բազում չար հաւատացեալները՝ նրանք, ովքեր սոսկ հաւատացելի անունն են կրում, իսկ բարի գործերից հեռացած են: Սրանք թէպէտեւ լեզուով հաւատում են, սակայն սրտով հեռացած են եւ գործով ուրանում են Աստծուն՝ ըստ այսմ. «Ձուր են ինձ պաշտում. լեզուով են հաւատում, իսկ սրտով հեռացած՝ մեկուսի են ինձանից»³: Այս է մարդկանց առաջին դասը:

Երկրորդ՝ ոմանք փնտրում են Աստուծոյ արքայութիւնը, բայց չեն գտնում: Սրանք սնափառներն ու մարդահաճններն են, որոնք պերճանում են փառասիրութեան հողմով. բարիք են գործում, սակայն փառամոլութեան պատճառով կորցնում են իրենց վարձը. մարմնով մեռնում են, սակայն հոգով չեն ապրում. չարչարում են, սակայն չեն հանգստանում. տանջւում են, բայց պսակի չեն արժանանում, քանզի այդ իսկ է նրանց վարձը⁴:

Սրանց մասին ասաց Տէրը. «Միմեանցից էք փառք ստանում, իսկ Միակ Աստուծոյ փառքը չէք փնտրում»⁵: Սրանց մասին է ասում Դաւիթ մարգարէն. «Տէրը կցրի մարդահաճների ոսկորները»⁶: Այս դասին է պատկանում փարիսեցին, որն ասում էր. «Գոհանում եմ Քեզանից, Տէ՛ր, որովհետեւ այնպիսին չեմ, ինչպէս մարդկանցից ոմանք»⁷: Ահա այսպիսի չարիք է փառասիրութիւնը. քանզի նա արդար մտաւ տաճար, բայց աղօթելիս մեղանչեց եւ մեղքով ելաւ այնտեղից: Իսկ մաքսատորը, որ խոնարհութեամբ կուրծքն էր ծեծում եւ արտասւում, մեղքերով մտաւ տաճար, բայց արդարացած դուրս եկաւ այնտեղից: Սա է մարդկանց երկրորդ դասը, որոնք փառասիրութեամբ փնտրում են, սակայն չեն գտնում արքայութիւնը:

Երրորդ՝ ոմանք փնտրում են ու գտնում, սակայն չեն պահում: Այդ նրանք են, ովքեր միառժամանակ հաւատում են, բայց փորձութեան պահին ընկրկում են եւ այս անցատր կեանքի պատճառով զրկում անանց կեանքից. մի փոքր ժամանակ վայելում են երկրի վրայ եւ յաիտեանապէս տանջւում դժոխքում: Եւ յիրաի այսպէս է, քանզի ուրանում են Փրկչին ու Տիրոջը եւ կորչում առանց փրկուելու, ինչպէս նրանք, ովքեր լոյսը մերժելով՝ տանջւում են խաւարում: Սրանց մասին է ասում Տէրը. «Ով ուրանայ ինձ մարդկանց առջեւ, Ես էլ նրան կուրանամ իմ Հօր եւ հրեշտակների առջեւ»⁸: Սրանց օրինակն էին այն աշակերտները, որոնք երբ լսեցին Տիրոջից. «Եթէ չուտէք մարդու Ռդդու Մարմինը եւ

2 Տե՛ս Յոք իԱ 14-15:

3 Հմմտ. Ես. իԹ 13:

4 Տե՛ս Մատթ. Զ 2, 5, 16:

5 Տե՛ս Մատթ. Ե 44:

6 Սաղմ. ԾԲ 6

7 Տե՛ս Դով. ԺԸ 11:

8 Տե՛ս Մատթ. Ժ 33, Դով. ԺԲ 9:

չխմէք Նրա Արիւնը, ձեր անձերում կեանք չէք ունենայ», ասացին. «Խիստ է խօսքդ: Ո՞վ կարող է այն լսել», ու հեռացան⁹: Այսպիսիների մասին է ասում առաքելալը. «Նրանց համար աւելի լաւ էր, եթէ ճշմարտութեան ճանապարհը ճանաչած չլինէին, քան ճանաչէին ու ետ դառնային»¹⁰: Այսպէս ոմանք փնտրում եւ գտնում են, սակայն չեն պահում Աստուծոյ արքայութիւնը:

Իսկ չորրորդ դասը նրանք են, ովքեր փնտրում են Աստուծոյ արքայութիւնը, գտնում են եւ պահում: Նրանք այնպիսի սիրով են միաւորում Աստուծոյ հետ, որ ոչինչ են համարում աշխարհի բոլոր վայելքները, եւ, ըստ առաքելալի, ոչինչ չի կարող նրանց բաժանել Քրիստոսի սիրուց՝ ո՛չ Անդրութիւնները, ո՛չ հալածանքները, ո՛չ այլ ինչ¹¹: Նրանք մշտապէս առաւելանում են բարի գործերում եւ յառաջ ձգտում. «Անցեալը մոռացած՝ դէպի առաջ եմ նկրտում»¹², - ասում է առաքելալը: Եւ Մըշմարտութիւնն ասում է Աւետարանում. «Ով ձեռքը մաճի վրայ է դրել ու ետ է նայում, բարեյարմար չէ արքայութեան համար»¹³: Նրանք նման են այն չորս կենդանիներին, որոնց տեսաւ Եզեկիէլը՝ լի աչքերով՝ առջեւից ու ետեւից, որ ընթանում ու ետ չէին դառնում¹⁴:

Պէտք է այսպէ՛ս փնտրենք Աստուծոյ արքայութիւնը՝ հաւատով, յոյսով եւ կատարեալ սիրով, եւ ապա կարող ենք գտնել այն: Եւ պէտք է իմանալ, որ ոմանք այն փնտրում

են միամիտ սրտով, իսկ ոմանք՝ երկմտութեամբ: Միամիտ սրտով նրանք են փնտրում, ովքեր սրտի ամբողջ բաղձանքը բեւեռում են դէպի Նա. միշտ յօծար կամքով, ե՛ր հոգով, ե՛ր մարմնով երկնքի արքայութիւնն են կարօտում: Ինչպէս որ ջրի ծարաւ ունեցողներն են, այնպէս էլ նրանք՝ կենաց ջրի, ինչպէս Դաւիթն է ասում. «Իմ անձը երկրի պէս ծարաւ է Քեզ, լսի՛ր ինձ, քանզի նուաղեց իմ հոգին»¹⁵: Այսպէս փնտրելու մասին է ուսուցանում Սողոմոն իմաստունը՝ ասելով. «Խորհեցէ՛ք Տիրոջ մասին բարութեամբ. եւ միամիտ սրտով փնտրեցէք Նրան»¹⁶: Իսկ երկմտութեամբ փնտրողները նրանք են, ովքեր կամենում են այս կեանքում հարստանալ, հեշտանալ ու պատուել եւ հանդերձեալում նոյնպէս պսակուել: Սակայն այդպէս չի լինում երբէք: Տէրն ասում է. «Չէք կարող ծառայել երկու տիրոջ՝ Աստծուն եւ մամոնային»¹⁷: Եւ մարգարէն ասում է. «Վա՛յ նրանց, ովքեր ընթանում են երկու ճանապարհով»¹⁸: Երկու ճանապարհներն են՝ մէկը՝ Աեղն ու անձուկը, որ տանում է դէպի կեանք, իսկ միւսը՝ լայնը եւ ընդարձակը, որ կորստեան է տանում¹⁹: Որովհետեւ չենք կարող հեշտութեամբ հանգիստ գտնել, ինչպէս ասում է առաքելալը. «Պէտք է բազում Անդրութիւններով մտնել հանգիստ, քանզի նա, ով կցորդում է չարչարանքներին, նաեւ Քրիստոսի փառքին է հաղորդ դառնում»²⁰: Ուստի պէտք է միա-

9 Տե՛ս Թովհ. Զ 54, 61, 67:

10 Տե՛ս Բ Պետ. 21:

11 Տե՛ս Հոմ. Ը 35:

12 Տե՛ս Փլա. Գ 13:

13 Տե՛ս Ղուկ. Թ 62:

14 Տե՛ս Եզեկ. Ա 4-27:

15 Տե՛ս Սաղմ. ՄԽԲ 6, 7:

16 Իմաստ. Ա 1

17 Տե՛ս Մատթ. Զ 24, Ղուկ. ԺԶ 13:

18 Հմմտ. Առակ. ԻԸ 18:

19 Տե՛ս Մատթ. Է 13, 14:

20 Հմմտ. Գործ. ԺԴ 21, Հոմ. Ը 17, Եբր. Դ 3:

մի՛տ սրտով փնտրել այն, որովհետև սա է այն պատուական մարգարիտը, որի համար տալիս ենք մեր ողջ ունեցուածքը²¹՝ ո՛չ միայն մարմնական ինչքերն ու ստացուածքները, այլև մարմինը, նրա հեշտութիւններն ու բոլոր ցանկութիւնները, որից յետոյ գտնում ենք Աստուծոյ արքայութիւնը:

Արդ, փնտրենք այն, եղբայրներ՛, ոչ այնպէս, ինչպէս Ղովտի կինը, որ ետ նայեց եւ աղէ արձան դարձաւ, քանզի թէև դուրս ելաւ Սողոմից, սակայն ետ շրջուելով՝ կործանուեց²²: Նոյնպէս եւ մենք, եթէ արքայութիւնը փնտրելով՝ թողնում ու ետ ենք դառնում դէպի աշխարհի սէրը, կործանում ենք: Այլ փրկութենք այն Հարաւի դշխոյի ման, որ երկրի ծայրերից եկաւ՝ լսելու Սողոմոն արքայի իմաստութիւնը²³: Սողոմոն թարգմանում է իմաստութիւն՝ խորհրդանշելով մեր Տէր Յիսուս Բրիստոսին, որ խաղաղութիւն արարեց երկնքում ու երկրի վրայ. Հայր Աստծուն հաշտեցրեց արարածների հետ եւ հրեշտակներին ու մարդկանց եւ հրեաների ու հեթանոսների Եկեղեցիները միատրեց մի խաղաղութեան մէջ: Իսկ Հարաւի դշխոն խորհրդանշում է Եկեղեցին՝ հաւատացեալներին, որ ճշմարտապէս եկանք երկրի ծագերից, այսինքն՝ հեթանոսական կրօններից՝ լսելու Բրիստոսի վարդապետութիւնը:

Դարձեալ՝ փնտրենք այն մեղատր կնոջ ման, որը իղով օծեց Բրիստոսի ոտքերը եւ որին Տէրն ասաց. «Գնա՛ խաղաղութեամբ, թող ներուած լինեն քո մեղքերը»²⁴: Այլև փնտրենք այնպէս, ինչպէս որ Յիսուսին տես-

21 Տե՛ս Մատթ. ԺԳ 46

22 Տե՛ս Մճ. ԺԹ 26:

23 Տե՛ս Գ Թագ. Ժ 1-5, Բ Մճ. Թ 1-4:

24 Տե՛ս Ղով. Է 49, 50:

նել էր ձգտում կարճահասակ Զակէոսը, որ ամբոխի պատճառով ժանտաթզենու ծառը ելաւ, եւ Տէրը, նրա տունը մտնելով, ասաց. «Այսօր փրկութիւն եղաւ այս տան համար»²⁵: Փնտրենք այն իմաստուն կոյսերի պէս, որոնք վառել էին իրենց լապտերները ողորմութեան իղով, եւ ոչ թէ յիմար կոյսերի պէս՝ մարած լապտերներով, որոնց Տէրն ասաց. «Մշմարիտ եմ ասում, չե՛մ ճանաչում ձեզ»²⁶: Փնտրենք, եղբայրներ՛, ոչ թէ ունայն ու անցատր կեանքը, այլ Աստուծոյ արքայութիւնը, որ անանց է եւ մշտնջենական:

Բ

Արքայութեան մասին

Տէրն ասում է. «Երկնքի արքայութիւնը մնանուեց ազարակում ծածկուած գանձի»²⁷: Եւ արքայութիւնը գանձ է անուանում, որովհետև այն ստացողների համար գանձ է, լիութիւն եւ անհատնելի հարստութիւն: Նաեւ գանձի պէս ծածկուած է շատերից, եւ ամէն մարդ չի կարող գտնել: Դարձեալ՝ ովքեր փնտրում են, գտնում են այն, ինչպէս որ գրտնում են գանձ որոնողները: Վերջապէս՝ գանձ է, որովհետև այն գնում են եւ առանց վճարելու չեն կարող ստանալ, քանզի Աստուած այս կեանքը ձրի տուեց, մինչդեռ արքայութիւնը տալիս է գնով եւ բազում աշխատութեամբ:

Եւ յայտնի է, որ երկնքի արքայութիւնը բազմիմաստ է:

Նախ՝ Աստուծոյ արքայութիւնն է մեր Տէր Յիսուս Բրիստոս՝ Որդին վերին Արքայի՝ ըստ այսմ. «Ապաշխարեցէ՛ք, քանզի մերձե-

25 Տե՛ս Ղով. ԺԹ 2-9:

26 Տե՛ս Մատթ. ԻԵ 2-12:

27 Տե՛ս Մատթ. ԺԳ 44:

ցել է երկնքի Արքայութիւնը»²⁸, այսինքն՝ Աստուծոյ Որդին: Եւ այն ծածկուած է մարմնի ազարակում՝ շատերի համար մնալով անյայտ, քանզի անհաւատների եւ հեթանոսների համար ո՛չ ճանաչելի է, ո՛չ էլ գտնելի: Եւ Արքայութիւն է կոչուում, որովհետեւ Նրա հետ թագաւորելու ենք երկնքում, ինչպէս առաքեալն է ասում. «Եթէ համբերենք, Նրա հետ կթագաւորենք»²⁹:

Երկրորդ՝ արքայութիւն է կոչուում նաեւ սուրբ Եկեղեցին՝ հաւատացեալ ժողովուրդը, ինչպէս ասում է Աւետարանում. «Երկնքի արքայութիւնը նման է ծով նետուած ուռկանի, որ ամէն տեսակ ձուկ է հաւաքել, որը երբ լցուեց, ցամաք հանեցին»³⁰: Արդ, սուրբ Եկեղեցին արքայութիւն է կոչուում, որովհետեւ հաւատացել է երկնքի Արքային. եւ նա, ով այս կեանքում ստանում է արքայութիւնը եւ գործում, այնտեղ՝ հանդերձեալում, արժանանում է մեծ փառքի եւ, բնակուելով երկնքի արքայութեան մէջ, Բրիստոսի հետ թագաւորում:

Երրորդ՝ արքայութիւն է կոչուում աստուածային Սուրբ Գիրքը, որի մասին առաքեալն ասում է. «Մերժեցիք Աստուծոյ խօսքը եւ անարժան եղաք յաւիտենական կեանքին»³¹: «Այս պատճառով, - ասում է Բրիստոս, - արքայութիւնը (այսինքն՝ Սուրբ Գիրքը) կվերցուի ձեզանից եւ կտրուի այն ազգին, որը պտղաբեր կդարձնի այն»³²: Եւ այն ծածկուած է բառերով, առակներով ու նիւթերէն գրերով. եւ Աստուծոյ արքայութիւն է կոչուում, որովհետեւ Սուրբ Գրքում գրուած պա-

տուիրանները պահողների համար բացում է երկնքի արքայութեան մուտքը:

Չորրորդ՝ արքայութիւն են կոչուում նաեւ Եկեղեցու խորհուրդները, ինչպէս մկրտութիւնը, ապաշխարութիւնը, քահանայութիւնը, պատարագը եւ այլն: Սրանք եւս ծածկուած են նիւթական իրերով, որպէսզի հաւատացեալները գտնեն, իսկ անհաւատները կորցնեն: Եւ արքայութիւն են կոչուում, որովհետեւ տանում են դէպի արքայութիւն եւ սրբագործելով՝ միաւորում երկնքի Արքայի հետ:

Հինգերորդ՝ արքայութիւն է կոչուում եւ մարդու հոգին, որ ծածկուած է մարմնի ազարակում՝ անտես լինելով զգայարանների եւ տեսանելի՝ մտքի համար, որի մասին է Տէրն ասում. «Աստուծոյ արքայութիւնը ձեր ներսում է»³³: Եւ արքայութիւն է կոչուում, քանզի երկնքի արքայութեան պատկերն է, ինչպէս գրուած է. «Աստուած ստեղծեց մարդուն ըստ իր պատկերի»³⁴: Եւ այսպէս հոգին մեր մէջ Աստուծոյ պատկերն է եւ արքայութիւն՝ սուրբ գործերի միջոցով: Իսկ չար գործերի միջոցով այն դառնում է սատանայի պատկերը, մեղքերի տուն եւ դժոխք: Ահա այսքան չար են մեղքերը, որ արքայութիւնը վերածում են դժոխքի:

Վեցերորդ՝ արքայութիւն է կոչուում եւ յաւիտենական կեանքը, որ վերին քաղաքն է՝ հրեշտակների եւ հրեշտակացած սուրբերի բնակավայրը: Սրա մասին է Տէրն ասում. «Երանի՛ հոգով աղքատներին, քանզի նրանցն է երկնքի արքայութիւնը»³⁵. իսկ մէկ այլ տեղ ասում է. «Իմ թագաւորութիւնն այս

28 Մատթ. Գ 2

29 Տե՛ս Բ Տիմ. Բ 12:

30 Հմմտ. Մատթ. ԺԳ 47:

31 Տե՛ս Գործ. ԺԳ 46:

32 Մատթ. ԻԱ 43

33 Դուկ. ԺԷ 21

34 Ծն. Ա 27

35 Մատթ. Ե 3

աշխարհից չէ»³⁶: Եւ այն արքայութիւն է կոչուում, որովհետեւ բոլոր երանութիւնների ու փառքերի լրումն է եւ ծայրագոյն հարստութիւն: Այդ պատճառով Տէրն ասում է. «Նախ Աստուծոյ արքայութիւնը փնտրեցէք»³⁷, որովհետեւ նախ պէտք է փնտրել եւ ապա՝ գտնել, իսկ ովքեր չեն փնտրում, չեն գտնում: Այսպիսով, պէտք է փնտրել, գտնել ու պահել:

Գ

Խնդրուածքների մասին

Յայտնի է, որ մարդու բոլոր խնդրուածքները երկու տեսակ են լինում. մէկը՝ սեփական անձի, իսկ միւրը՝ այլոց համար: Արդ, սեփական անձի համար խնդրուածքները չորսն են: Առաջինը այն է, որը Տէրն ուսուցանեց՝ ասելով. «Փնտրեցէ՛ք Աստուծոյ արքայութիւնը եւ Նրա արդարութիւնը»³⁸: Ամենից առաջ պէտք է խնդրել արքայութիւնը, այսինքն՝ Քրիստոսին տեսնելը, որը եւ արժանացնում է յաիտենական կեանքին: Այս խնդրուածքի մէջ է նաեւ մեղքերի թողութեան հայցումը (որն արդարացնում է մեզ, ինչպէս ասում է՝ եւ Նրա արդարութիւնը) եւ ապա՝ յաիտենական տանջանքներից ու գեհեմի հրից փրկութեան հայցումը:

Այսպիսով, մեղքերի թողութիւն, փրկութիւն տանջանքներից, երկնքի արքայութիւն եւ Քրիստոսի տեսութիւն՝ այս չորսն է պարունակում Տիրոջ ուսուցանած խօսքը. «Փնտրեցէ՛ք Աստուծոյ արքայութիւնը եւ Նրա արդարութիւնը»: Եւ նոյնը ուսուցանեց ասել ա-

ղօթքում. «Թող սուրբ լինի Քո անունը, թող գայ Քո արքայութիւնը, թող Քո կամքը լինի»³⁹:

Երկրորդ՝ սրանից յետոյ պէտք է Նրանից յաջողութիւն խնդրել հաւատի եւ գործերի մէջ, քանզի հաւատը, յոյսը եւ սէրը Աստուծոյ շնորհներն են⁴⁰. ինչպէս եւ՝ խոհեմութիւն ու արիութիւն՝ բարի գործերում, եւ ողջախոհութիւն ու արդարութիւն՝ ամէն ինչում⁴¹: Այս ամէնը Աստուծոյ պարգեւներն են, որոնք ում կամենում՝ տալիս է, եւ ովքեր խնդրում են, ստանում են: Աստուածային առաքինութիւնների մասին է ասուած. «Եթէ մէկը հաց խնդրի հօրից, մի՞թէ նա քար կտայ»⁴². հացը խորհրդանշում է հաւատը, որ կեանքի պատճառ է, իսկ քարը՝ անհաւատութիւնը: «Եւ եթէ ձուկ խնդրի, մի՞թէ օձ կտայ»⁴³. ձուկը յոյսն է, իսկ օձը՝ յուսահատութիւնը: «Եւ եթէ ձու խնդրի, մի՞թէ կարիճ կտայ»⁴⁴. ձուն խորհրդանշում է սէրը, որ բոլորածու է ու կատարեալ, իսկ կարիճը՝ ասելութիւնը, որ խայթիչ է հոգու համար եւ ցաւաբեր:

Նմանապէս մարդկային առաքինութիւնների մասին Տէրն ասում է. «Առանց Ինձ ոչինչ անել չէք կարող»⁴⁵, քանզի Նա է, որ յաջողում է մեր մէջ կամենալն ու կատարելը⁴⁶:

39 Տե՛ս Մատթ. Զ 10:

40 Հաւատը, յոյսը եւ սէրը կոչւում են աստուածային առաքինութիւններ:

41 Խոհեմութիւնը, արիութիւնը, ողջախոհութիւնը եւ արդարութիւնը կոչւում են մարդկային առաքինութիւններ:

42 Տե՛ս Մատթ. Է 9:

43 Տե՛ս Մատթ. Է 10, Դուկ. ԺԱ 11:

44 Տե՛ս Դուկ. ԺԱ 12:

45 Յովհ. ԺԵ 5

46 Տե՛ս Փլպ. Բ 13:

36 Յովհ. ԺԸ 36

37 Տե՛ս Մատթ. Զ 33:

38 Նոյն տեղում

Երրորդ խնդրուածքը մարմնի անհրա-
ժեշտ կարիքների համար է, ինչպիսիք են չա-
փաւոր կերակուրը եւ հանդերձը՝ ըստ Տիրոջ
ուսուցանութեան. «Մեր հաճապագօրեայ
հացը տո՛ւր մեզ օրըստօրէ՛»⁴⁷: Չափաւորն
ենք խնդրում եւ ոչ թէ աւելորդը, ինչպէս առա-
քեալն է ասում. «Կերակուր եւ հանդերձ ու-
նենք եւ դրանցով պիտի բաւարարուենք»⁴⁸:
Հանդերձն այն է, ինչ ծածկում է մարմինը եւ
պահում ցրտից, իսկ զանազան կերպերով
զարդարուելը եւ առաւել ուտելն ու ըմպելը
չարից է եւ հեթանոսներինը, ոչ թէ մերը: Նը-
մանապէս էլ՝ երբ մարմնի առողջութիւն ենք
խնդրում եւ ազատութիւն գերութիւնից կամ
չար տէրերից: Եւ այս խնդրում ենք, որպէսզի
առողջութեամբ բարի՛ն գործենք, Տիրոջը ծա-
ռայենք, պաս պահենք եւ աղօթենք: Իսկ եր-
կար ապրելու համար մարմնի առողջութիւն
եւ հեշտութիւն խնդրելը հեթանոսների՛ սովո-
րութիւնն է, որոնք աւելորդն են խնդրում:

Մեր անձերի համար չորրորդ խնդրուած-
քը մեղքերի փորձութիւններից, սատանայի
որոգայթից, չար մարդկանցից, գազաններից
եւ սոյնպիսիներից փրկուելու մասին է, ինչ-
պէս ուսուցանեց Տէրը. «Մի՛ տար մեզ փոր-
ձութեան, այլ փրկի՛ր չարից»⁴⁹:

Բայց եթէ միայն մեր անձերի համար
խնդրենք, անձնասէր եւ անողորմ կլինենք,
ուստի անհրաժեշտ է նաեւ այլոց համար ա-
ղօթել: Իսկ վերջինիս օգտակար լինելը ցոյց
է տալիս առաքեալի խօսքը. «Արդարի ա-
ղօթքը յոյժ զօրաւոր է օգնելու համար»⁵⁰:

47 Տե՛ս Մատթ. 2 11:

48 Ա Տիմ. 2 8

49 Մատթ. 2 13

50 Թակ. Ե 16

Արդ, այլոց համար խնդրուածքներն էլ
չորսն են:

Առաջին հերթին պէտք է խնդրել թագա-
ւորների եւ աստուածասէր իշխանների հա-
մար՝ ըստ առաքեալի խօսքի. «Ամէն ինչից
առաջ աղօթք անել, խնդրուածք եւ պաղա-
տանք մատուցել բոլոր մարդկանց համար,
մանաւանդ՝ թագաւորների եւ իշխանների,
որպէսզի հանդարտութեամբ վարենք մեր
կեանքը»⁵¹. այսինքն՝ նրանք մեզ պահեն մեր
թշնամիներից, որպէսզի խաղաղութեամբ
կատարենք մեր աստուածայաշտութիւնը:
Պէտք է նրանց համար Աստծուց խնդրել եր-
կար կեանք, առողջութիւն, յաղթութիւն թշնա-
միների նկատմամբ եւ այլն: Այս խնդրուած-
քում պէտք է աղօթել նաեւ հոգեւոր առաջ-
նորդների համար (թէ՛ մեր անմիջական ա-
ռաջնորդների ու խնամիչների, թէ՛ ընդհանուր
Եկեղեցու՝ քահանաների, եպիսկոպոսների,
վարդապետների ու հայրապետների): Պէտք
է հայցել նաեւ խաղաղութիւն եւ միաբանու-
թիւն համայն աշխարհի եւ Եկեղեցու համար,
օդի բարեխառնութիւն, անձրեւի ու բերքի ա-
ռատութիւն, ինչպէս նաեւ պատուհասների եւ
ամէն տեսակ խռովութիւնների վերացում
մարդկանց միջից:

Երկրորդ՝ պէտք է խնդրել հաւատացեալ
ննջեցեալների համար, քանզի եթէ աղքատ-
ներն ու չքաւորները կարօտ են ողորմութեան,
առաւել եւս՝ նրանք, ովքեր զրկուել են բոլոր
բարիքներից ու յայտնուել անճարութեան մէջ:
Եւ եթէ հաշմանդամներին ենք ողորմութիւն
անում, որքա՛ն առաւել պէտք է նրանց ողոր-
մել, որոնց ողջ մարմինն է ապականուել ու

51 Տե՛ս Ա Տիմ. 1 1-2:

տարալուծուել հողի մէջ: Եւ եթէ մարդկանց ձեռքը գերի ընկածներին ենք ողորմում, որքա՛ն առաւել պէտք է նրանց ողորմել, ովքեր մեղքերի պատճառով մատնուել են սատանային: Եւ քանի որ իրենք չեն կարող ապաշխարել մեղքերի համար, եւ մեռելաւերն էլ չեն կարող օգնել մեռելաւերին ու տալ խնդրածը (ինչպէս որ Աբրահամը հարուստին մի կաթիլ ջուր իսկ չտուեց⁵²), ուստի միայն մարդասէր եւ գթած Աստուծոյ ողորմութիւնն են ակնկալում եւ կարօտում ողջերի աղօթքներին, ինչպէս երանելի Յոբն էր ասում նրանց անունից. «Ողորմէ՛ք, ողորմէ՛ք ինձ, բարեկամներ՛ր, քանզի Տիրոջ ձեռքը դիպաւ ինձ»⁵³: Հետեւաբար մենք պէտք է ողորմենք եւ աղօթենք նրանց համար, ովքեր յոյսով եւ հաւատով անջեցին ի Քրիստոս, եւ աշխարհի սխալանքներից ինչ-ինչ բաներ մնացին նրանց մօտ. նաեւ նրանց համար պէտք է մեղքերի թողութիւն խնդրել, ովքեր, յանկարծակի մեռնելով (պատերազմում, գազաններից, հեղեղից, հողմից, կայծակից, հիւանդութիւնից կամ այլ պատահարներից), չկարողացան խոստովանել իրենց մեղքերը եւ սուրբ պսակի արժանանալ: Եւ այսպէս, պէտք է յիշել սուրբերին ու արդարներին որպէս բարեխօսների, իսկ մեղաւորներին՝ նրանց համար ներում խնդրելով: Եւ առհասարակ պէտք է յիշել բոլորին՝ թէ՛ ծանօթներին, թէ՛ անծանօթներին, թէ՛ մեր խնամքին յանձնուած երախտաւորներին՝ թէ՛ սուրբ պատարագի ընթացքում, թէ՛ մեր ամենօրեայ աղօթքներում:

Երրորդ՝ պէտք է խնդրել նրանց համար, ովքեր տակաւին կենդանի են երկրի վրայ՝ թէ՛

հարազատների, թէ՛ օտարների՝ ճամփորդների ու նաւորդների, զանազան վտանգների մէջ նեղուողների, հիւանդների, տրտմեալների, ղեկավարների, արուեստաւորների, բարեկամների ու երախտաւորների: Այս աղօթքում պէտք է նաեւ առողջութիւն եւ խաղաղութիւն, ուղիղ վարք, անբիծ հաւատ եւ սոյնպիսի բաներ հայցել ժողովրդի, աշակերտների, որդիների, զաւակների եւ այլոց համար:

Չորրորդ՝ պէտք է խնդրել թշնամիների համար՝ ըստ Տիրոջ հրամանի. «Սիրել ատելիներին եւ աղօթել թշնամիների համար»⁵⁴: Եւ պէտք է գիտենալ, որ թշնամիները երեքն են. նախ՝ սատանան, որ ատելի է թէ՛ Աստուծոյ, թէ՛ մեզ համար. երկրորդ՝ անհաւատներն ու մեղաւորները. եւ երրորդ՝ մեր վնասարարներն ու թշնամիները: Արդ, սատանային, որ ատելի է Աստծուն, պէտք է մենք եւս ատենք ու անհծենք, ինչպէս մարգարէն է ասում. «Քեզ ատելիներին, Տէ՛ր, ատեցի եւ Քո թըշնամիներից գարշեցի»⁵⁵: Իսկ մեղաւորների ու անհաւատների համար պէտք է աղօթել, որ Աստուած նրանց հաւատ տայ, եւ ետ դառնան մեղքից ու չմեռնեն անհաւատութեամբ ու մեղքով: Այս մասին է ասում մարգարէն. «Տրտմութիւն պատեց ինձ մեղաւորների համար, ովքեր թողեցին Քո օրէնքը»⁵⁶. քանզի պէտք է տրտմել մեղաւորների եւ անհաւատների համար, որ դէպի կորուստ են ընթանում: Եւ նրանց ո՛չ օրհնել է պէտք, ո՛չ էլ անհծել: Իսկ մեր թշնամիները երկուսն են: Եթէ միայն մեր անձնական թշնամին է՝ մարմնի կամ ունեցուածքի պակասութիւն է պատճառել,

52 Տե՛ս Ղուկ. ԺԶ 19:

53 Յոբ ԺԹ 21

54 Տե՛ս Մատթ. Ե 44, Ղուկ. Զ 27:

55 Տե՛ս Սաղմ. ԾԼԸ 21:

56 Սաղմ. ԾԺԸ 53

մի՛շտ պէտք է օրհնել եւ ոչ թէ անհծել, ինչ-պէս գրուած է. «Օրհնեցէ՛ք ձեզ անհծողներին եւ մի՛ անհծէք, բարի՛ արեք ձեզ ատողներին»⁵⁷: Եւ պէտք է մերժենք մեր սրտերից քէնն ու ոխը՝ ըստ այսմ. «Եթէ թողնէք մարդկանց իրենց յանցանքները, ձեր Հայրն էլ կթողնի ձեր յանցանքները»⁵⁸: Իսկ եթէ թըշնամի են ու վնասարար ընդհանուր Եկեղեցու եւ հաւատի նկատմամբ, պէտք է աղօթել նըրանց համար, որպէսզի ետ դառնան չարիքից: Սակայն եթէ անգեղջ մնան, ինչպէս չար ու մեղաւոր մարդիկ եւ հերձուածողները, պէտք է նախատել եւ ոչ թէ օրհնել, քանզի նրանք եւս Աստուծոյ հաւատի ու կրօնի թշնամիներն են:

Այսպէս պէտք է ընտրողաբար խնդրել եւ աղօթել: Եւ Ինքը՝ մեր Տէր Յիսուս Քրիստոս, որ առատաձեռն է իրաքանչիւրիս բարիքներ շնորհելու մէջ, որ փոքր խնդրանքի դիմաց մեծամեծ պարգևներ է տալիս, որ գիտէ նախքան մեր խնդրելը եւ պարգևում է նախքան աղերսելը, մեր բոլոր խնդրուածքները թող ի բարին կատարի: Քանզի տեսնում է անհոգներին եւ մեր միտքն ու կամքը դէպի բարին շարժում: Եւ թող իր արարչական խնամքով թողնի մեր յանցանքները եւ բոլորիս առատապէս լցնի հոգեւոր ու մարմնաւոր բարիքներով. եւ Նրան փա՛ռք եւ գոհութի՛ւն եւ երկրպագութի՛ւն իր Հօր եւ Ամենասուրբ Հոգու հետ. ամէն:

57 Յե՛ս Մատթ. Ե 44, Հոով. ԺԲ 14:

58 Յե՛ս Մատթ. Զ 14: